

四庫全書

子部

欽定四庫全書

子部

太平廣記卷一百八十二至

七

詳校官中書臣潘有為

侍讀臣孫球覆勘

總校官進士臣楊懋珩

校對官助教臣胡予襄

校對官中書臣鮑之鍾

謄錄監生臣何霈霖

謄錄監生臣袁繼升

欽定四庫全書

太平廣記卷一百八十二

貢舉五

崔蠡

盧肇

丁稜

顧非熊

李德裕

張瀆

宣宗

盧渥

劉蛻

苗台符

張讀

許道敏

崔殷夢

顏標

溫庭筠

盧象

翁彥樞

劉虛白

封定卿

馮藻

趙琮

崔蠡

唐崔蠡知制誥日丁太夫人憂居東都里第時尚清苦  
儉嗇四方寄遺茶藥而已不納金帛故朝賢家不異寒  
素雖名姬愛子服無輕細崔公卜兆有期居一日宗門  
士人有謁請于蠡者閤吏拒之告曰公居喪未嘗見他  
客乃曰某崔家宗門子弟又知尊夫人有卜遠之日願

一見公公聞之延入與語直云知公居縉紳間清且約太夫人喪事所須不能無費某以辱孫姪之行又且贊用稍給願以錢三百萬濟公大事蠡見其慷慨深奇之但嘉納其意終却而不受此人調舉久不第亦頗有屈聲蠡未幾服闋拜尚書右丞知禮部貢舉此人就試蠡第之為狀元衆頗驚異謂蠡之主文以公道取士崔之獻藝由善價成名一第則可矣首冠未為得以是人有告於蠡者答曰崔某固是及第人但狀頭是某私恩所

致耳具以前事告之於是中外始服名益重焉

出芝田錄

### 盧肇

李德裕抑退浮薄獎拔孤寒於時朝貴朋黨德裕破之由是結怨而絕於附會門無賓客唯進士盧肇宜春人有奇才德裕嘗左宦宜陽肇投以文卷由此見知後隨計京師每謁見待以優禮舊例禮部放榜先呈宰相會昌三年王起知舉問德裕所欲答曰安用問所欲為如盧肇丁稜姚鵠豈可不與及第邪起於是依其次而放

出玉  
泉子

丁稜

盧肇丁稜之及第也先是放榜訖則須謁宰相其導啓  
詞語一出榜元者俯仰疾徐尤宜精審時肇首冠有故  
不至次乃稜也稜口吃又形體小陋迨引見即俛而致  
詞意本言稜等登科而稜頓然發汗鞠躬移時乃曰稜  
等登稜等登竟不能發其後語而罷左右皆笑翌日友  
人戲之曰聞君善箏可得聞乎稜曰無之友人曰昨日

聞稜等登稜等登非箏聲耶

出玉泉子

顧非熊

顧非熊況之子滑稽好辯凌轢氣焰子弟為衆所怒非熊既為所排在舉場垂三十年屈聲聒人耳會昌中陳商放榜上怪無非熊名召有司追榜放及第時天下寒進皆知勸矣詩人劉得仁賀詩曰愚為童稚時已解念君詩及得高科晚須逢聖主知

出摭言

李德裕



李德裕以已非由科第恒嫉進士舉者及居相位貴要  
束手德裕嘗為藩府從事日同院李評事以詞科進適  
與德裕官同時有舉子投文軸誤與德裕舉子既誤復  
請之曰某文軸當與及第李評事非與公也由是德裕  
志在排斥

出玉  
泉子

### 張漬

張漬會昌五年陳商下狀元及第翰林覆落漬等八人  
趙渭南貽漬詩曰莫向春風訴酒杯謫仙真箇是仙才

猶堪與世為祥瑞曾到蓬山頂上來

出撫言

### 宣宗

宣宗酷好進士及第每對朝臣問及第苟有科名對者必大喜便問所試詩賦題目并主司姓名或有人物稍好者偶不中第嘆惜移時常於內自題鄉貢進士李道

龍

出盧氏雜說

### 盧渥

唐陝州廩使盧渥在舉場甚有時稱曾於渚水逆旅遇

宣宗皇帝微行意其貴人斂身迴避帝揖與相見乃自稱進士盧渥帝請詩卷袖之乘驢而去他日對宰臣語及盧渥令主司擢第渥不自安恐僭冒之辱宰相問渥與主上有何階緣渥乃具陳因由時亦不以為忤蓋事業亦得之矣渥後自廉察入朝知舉遇黃寇犯闕不及終場趙崇大夫戲之曰出腹不生養主司也然盧家未嘗知舉盧相攜恥之拔為主文章不果也

出北夢  
瑣言

劉蛻

荆南解比號天荒大中四年劉蛻以是府解及第時崔  
鉉作鎮以破天荒錢七十萬資蛻蛻謝書略曰五十年  
來自是人廢一千里外豈曰天荒

出撫  
言

苗台符張讀

苗台符六歲能屬文聰悟無比十餘歲博覽羣籍著皇  
心三十卷年十六及第張讀亦幼擅詞賦年十八及第  
同年進士又同佐鄭薰少師宣州幕二人常列題於西  
明寺東廊或竊注之曰一雙前進士兩箇阿孩兒台符

十七不祿讀位至禮部侍郎

出撫言

許道敏

許道敏隨鄉薦之初獲知於時相是冬主文者將蒞事於貢院謁於相門相大稱其卓苦藝學宜在公選主文受命而去許潛知其旨則磨礪以須屈指試期大掛人口俄有張希復員外結婚於丞相奇章公之門親迎之夕辟道敏為賓道敏乘其喜氣縱酒飛章搖珮高譚極歡而罷無何時相敷奏不稱旨移秩他郡人情恐異主

文不敢第於甲乙自此晦昧塋坎不復振舉繼丁家故  
垂二十載至大中六年崔璵知舉方擢於上科時有同  
年張讀一舉成事年十有九乃道敏敗於垂成之冬儉  
導張希復之子牛夫人所生也

出唐  
闕史

### 崔殷夢

崔殷夢宗人瑤門生也夷門節度使龜從之子同年首  
冠於壤壤白瑤曰夫一名男子飾身世以為美他不可  
以等將也近歲闕試內多以假為名求適他處甚無謂

也今乞侍郎不可循其舊轍瑤大以為然一日壤等率  
集同年詣瑤起居既坐瑤笑謂壤等曰昨得大梁相公  
書且欲崔先輩一到駿馬健僕往復當不至稽滯幸諸  
先輩留意壤以坐主之命無如之何

出玉  
泉子

### 顏標

鄭侍郎薰主文舉人中有顏標者薰誤謂是魯公之後  
時徐方未寧志在激勸忠烈即以標為狀元及謝恩日  
從容問及廟院標曰標寒進也未嘗有廟院薰始大悟

塞默而已尋為無名子所嘲曰主司頭腦太冬烘錯認

顏標作魯公

出撫言

溫庭筠

溫庭筠燈燭下未嘗起草但籠袖凭几每賦一韻一吟

而已故場中號為溫八吟

出撫言

盧彖

崔沆及第年為主罰錄事同年盧彖俯近關讌堅請假  
往洛下拜慶既而淹緩久之及同年讌於曲江亭子彖



以雕幃載妓微服韞鞬縱觀於側遽為團司所發沆判  
之略曰深攬席帽密映羶車紫陌尋春便隔同年之面  
青雲得路可知異日之心

出撫  
言

### 翁彥樞

翁彥樞蘇州人應進士舉有僧與彥樞同鄉里出入故  
相國裴公坦門下以其年耄優惜之雖中門內亦不禁  
其出入手持貫珠閉目以誦佛經非寢食未嘗輟也坦  
主文柄入貢院子勛質日議榜于私室僧多處其間二

子不之虞也其擬議名氏迨與奪進退僧悉熟之矣歸寺而彥樞訪焉僧問彥樞將來得失之耗彥樞具對以無有成遂狀僧曰公成名須第幾人彥樞謂僧戲已答曰第八人足矣即復往裴氏之家二子所議如初僧忽張目謂之曰侍郎知舉邪郎君知舉邪夫科第國家重事朝廷委之侍郎意者欲侍郎剗革前弊孤平得路今之與奪率由郎君侍郎寧偶人邪且郎君所與者不過權豪子弟未嘗以一平人藝士議之郎君可乎即屈其

指自首至末不差一人其豪族私讎曲折畢中二子所諱勛等大懼即問僧所欲且以金帛啗之僧曰貧僧老矣何用金帛為有鄉人翁彥樞者徒要及第耳勛等曰即列在丙科僧曰非第八人不可也勛不得已許之僧曰與貧僧一文書來彥樞其年及第竟如其言

出玉泉子

### 劉虛白

劉虛白與裴坦早同硯席坦主文虛白猶是舉子試雜文日簾前獻一絕句云二十年前此夜中一般燈燭一

般風不知歲月能多少猶著麻衣待至公孟榮年長於  
魏公放榜日榮出行曲謝沆泣曰先輩吾師也沆泣榮  
亦泣榮出入場籍三十年長孫籍與張公舊交公兄呼  
籍公嘗諷其改圖籍曰朝聞道夕死可矣

出撫  
言

### 封定卿

大中後進士尤盛封定卿丁茂珪舉子與其交者必先  
登第而二公各二十舉方成名何進退之相懸也先是  
李都崔雍孫璿鄭嵎四君子蒙其眄睐者因是進昇故

曰欲得命通問理岫都雍

出北夢瑣言

### 馮藻

唐馮藻常侍宿之子涓之叔父世有科名藻文彩不高  
酷愛名第已十五舉有相識道士謂曰某曾入靜觀之  
此生無名第但有官職也亦未之信更應十舉已二十  
五舉矣姻親勸令罷舉且謀官藻曰譬如一生無成更  
誓五舉無成遂三十舉方就仕官厯卿監峽牧終於騎

省

出北夢瑣言

趙琮

趙琮妻父為鍾陵大將琮以久隨計不第窮悴甚妻族  
孟相薄雖妻父母不能不然也一日軍中高會州郡謂  
之春設者大將家相率列棚以觀之其妻雖貧不能無  
往然所服故敝眾以帷隔絕之設方酣廉使忽馳吏呼  
將將驚且懼既至廉使臨軒手持一書笑曰趙琮得非  
君子壻乎曰然乃告之適報至已及第矣即授所持書  
乃榜也將遽以榜歸呼曰趙郎及第矣妻之族即撤去

帷障相與同席競以簪服而慶遺焉

出玉  
泉子

太平廣記卷一百八十二



欽定四庫全書

太平廣記卷一百八十三

貢舉六

劉鄴

葉京

李藹

房珣

汪遵

劉允章

王凝

盧尚卿

李堯

高湜

公乘億

孫龍光

王璘

蔣凝

吳融

盧光啓

王彥昌

杜昇

鄭昌圖

程賀

陳嶠

秦韜玉

陸扆

張曙

崔昭矩

賈泳

劉鄴

劉鄴字漢藩咸通中自長春宮判官召入內庭特賜及第韋保義以兄在相位應舉不得特賜及第擢入內庭

出撫

言

葉京

葉京建州人也極有賦名向遊大梁常預公宴因與監軍使面熟及至京師時已遂登科與同年連鑣而行逢其人於通衢馬上相揖因之謗議喧然後頗至沈棄終

於太學博士

出撫言

李藹

李藹應舉功勤敏妙絕倫人謂之東翅鷄子咸通二年

及第

出盧氏雜說

房珮

房珮河南人太尉之孫咸通四年垂成而敗先是名第  
定矣無何寫試之際仰泥土落擊翻硯瓦污試紙珮以  
中表重地祇薦珮一人主事不獲已須應之珮既臨曙  
更請印副試主司不諾遂罷

出撫  
言

汪遵

許棠宣州涇縣人早修舉業鄉人汪遵者幼為小吏洎  
棠應二十餘舉遵猶在胥徒然善為絕句詩而深晦密

一旦辭役就貢會棠送客至灞澹忽遇遵於途中棠訊

之曰汪都

都者吏之呼也

何事至京遵對曰此來就貢棠怒曰

小吏無禮而果與棠同硯席棠甚侮之後遵成名五年

棠始及第

出撫言

### 劉允章

劉允章題目天下為家賦給事中杜裔體進疏論事雖  
不行時以為當崔澹至仁伐不仁賦亦頗招時議薛昫  
盛德日新賦韻脚云循乃無已劉子震通狀請改為修

字當時改正

出盧氏雜說

王凝

王凝清修重德冠絕當時每就寢息必叉手而卧或慮夢中見其先祖曾牧絳州於時司空圖方應進士舉自別墅到郡謁見後更不訪親知關吏遽申司空秀才出郭矣或入郭訪親知即不造郡齋王知之謂其專敬愈重之及知舉日司空一捷列第四人登科同年訝其名姓甚暗成事太速有浮薄者號之為司空空王知有此說

因召一榜門生開筵宣言於衆曰某竊忝文柄今年榜帖全為司空先輩一人而已由是圖聲彩益振

出北夢瑣言

盧尚卿

咸通十一年以龐勛盜據徐州久屯戎卒連年飛輓物力方虛因詔權停貢舉一年是歲進士盧尚卿自遠至關聞詔而迴乃賦東歸詩曰九重丹詔下塵埃深鏹文闈罷選才桂樹放教遮月長杏園終待隔年開自從玉帳論兵後不許金門諫獵來今日霸陵橋上過關人應

笑臘前迴

出年  
號記

李堯

李堯及第在偏侍下俯逼起居宴霖雨不止因遣賃油  
幕以張去聲之堯先人舊廬昇平里凡用錢七百緡自所

居連亘通衢迨至一里餘參御輩不啻千餘人羈馬車  
輿闐咽門巷往來無有霑濕者而金壁照耀別有嘉致  
堯時為丞相韋保衡所委干預政事號為李八郎其妻

又南海韋宙女恒資之金帛不可勝紀

出撫  
言



高湜

咸通十二年禮部侍郎高湜知舉榜內孤平者公乘億  
有賦三百首人多書於壁許棠有洞庭詩尤工時人謂  
之許洞庭最者有聶夷中少貧苦精於古體有公子家  
詩云種花滿西園花發青樓道花下一禾生去之為惡  
草又詠田家詩云父耕原上田子斲山下荒六月未未  
秀官家已修倉又云鉏田當日午汗滴禾下土誰念盤  
中餐粒粒皆辛苦又云二月賣新絲五月糶新穀賢得

眼前瘡剗却心頭肉我願君王心化為光明燭不照綺  
羅筵只照逃亡屋所謂言近意遠合三百篇之旨也  
言

出撫

公乘億

公乘億魏人也以詞賦著名咸通十三年垂三十舉矣  
嘗大病鄉人誤傳已死其妻自河北來迎喪會億送客  
至坡下遇其妻始夫妻濶別積十餘歲億時在馬上見  
一婦粗纓跨驢依稀與妻類因睨之不已妻亦如是乃

令人詰之果億內子與之相持而泣路人嘆異之後旬日

億登第矣

出撫言

### 孫龍光

孫龍光崔殷夢下狀元及第前一年嘗夢積木數百龍  
光踐履往復既而請一李處士圖之處士曰賀郎君喜  
來年必是狀元何者已居衆材之上

出撫言

### 王璘

長沙日試萬言王璘詞學富瞻非積學所致崔詹事廉

問特表薦之於朝先是試之於使院璘請書吏十人皆  
給几硯璘衿絺捫腹往來口授十吏筆不停輟首題黃  
河賦三十字數刻而成又鳥散餘花落詩三十首援毫  
而就時忽風雨暴至數幅為迴飈所卷泥滓霑漬不勝  
舒卷璘曰勿取但將紙來復縱筆一揮斯須復十餘篇  
矣時未停午已積七千餘言崔公語試官曰萬言不在  
試限但請召來飲酒黃河賦復有僻字百餘請璘對衆  
朗宣旁若無人至京時路巖方當軸遣一介召之璘意

在沾漱曰請俟見帝巖聞之大怒亟命奏廢萬言科璘杖策而歸放曠於杯酒間雖屠沽無間然矣

出撫言

### 蔣凝

乾符中蔣凝應宏詞為賦止及四韻遂白而去試官不之信逼請所謂凝以實告既而比之諸公凝有德色試官歎息久之頃刻之間播于人口或稱之曰白頭花鈿滿面不若徐妃半粧

出撫言

### 吳融

吳融字子華廣明中和間久負屈聲雖未擢第同人率多執贄謁之如先達有王圖者工詞賦投卷凡旬月融既見之殊不言圖之臧否但問圖曰君曾得盧休信否何堅卧不起惜哉融所得不如他休圖之中表長於八韻向與融同硯席晚年拋廢歸鏡中別墅

出撫言

盧光啓

盧光啓先人伏法光啓兄弟修飾赴舉謂親知曰此乃開荒也然其立性周謹著初舉子一卷即進取諸事皆

此類也策名後揚歷臺省受知於祖庸張濬濬出征并汾盧每致書疏凡一事別為一幅朝士至今數之益重疊別紙自光啓始也唐末舉人不問事行文藝但勤於請謁號曰精切亦皆法於光啓爾其族弟汝弼嘗為張濬出征判官傳檄四方其略云致赤子之流離自朱耶之版蕩自謂人曰天生朱耶赤子供我之筆也

出北夢瑣言

王彥昌

王彥昌太原人家世簪冕推於鼎甲廣明歲駕幸西蜀

敕賜及第後為嗣薛王知柔判官昭宗幸石門時宰臣  
學士不及隨駕知柔以京兆尹權中書事屬近輔表章  
繼至勤於批答知柔以彥昌名聞遂命權知學士居半  
歲出拜京兆尹加左常侍大理卿為寺胥所累南遷  
言

杜昇

杜昇父宣猷終宛陵昇有詞藻廣明歲蘇導給事刺劍  
州昇為郡倅駕幸西蜀例得召見特敕賜緋導尋入內



庭韋中令自翰長拜主文昇時已拜小諫抗表乞就試  
從之登第數日有敕復前官拜服色議者榮之

出撫  
言

昇自拾遺賜緋却應舉及第又拾遺時號著緋進士

出  
盧

氏雜  
說

鄭昌圖

被嘲  
附

廣明年中鳳翔副使鄭侍郎昌圖未及第前嘗自任以  
廣度弘襟不拘小節出入遊處恣情焉洎至輿論喧  
然且欲罷舉其時同里有親表家僕自宋亳莊上至告

其主人云昨過洛京於穀水店邊逢見二黃衣使人西來某遂與同行至華嶽廟前二黃衣使與某告別相揖於店後面謂某曰君家郎君應進士舉無僕曰我郎主官已高諸郎君見修學次又問曰莫親戚家兒郎應無曰有使人曰吾二人乃是今年送榜之使也自泰山來到金天處押署其榜子幸相遇僕遂請竊窺其榜使者曰不可汝但記之遂畫其地曰此年狀頭姓偏傍有卞名兩字下一字在口中榜尾之人姓偏傍亦有此卞名

兩字下一字亦在口中記之記之遂去鄭公親表頗異  
其事遂訪鄭具語之且勉以就試昌圖其年狀頭及  
第榜尾鄒希回也姓名畫點皆同

出玉堂  
閒話

又咸通中以進士車服僭差不許乘馬時場中不減千  
人雖勢可熱手亦皆騎驢或嘲之曰今年敕下盡騎驢  
短袖長鞦滿九衢清瘦兒郎猶自可就中愁殺鄭昌圖  
相國魁偉甚故  
有此句出撫言

### 程賀

唐崔亞郎中典眉州程賀以鄉役充廳僕其弟在州曹  
為小書吏崔公見賀風味有似儒生因詰之曰爾讀書  
乎賀降階對曰薄涉藝文崔公指一物俾其賦詠雅有  
意思因令歸選日裝寫所業執贄甚稱獎之俾稱進士  
依崔之門更不他岐凡二十五舉及第每入京館於博  
陵之第常感提拔之恩亞卒之日賀為崔公衰服三年

人皆美之

出北夢  
瑣言

陳嶠

陳嶠謁安陸鄭誠三年方一相面從容誠謂嶠曰識閔廷言否嶠曰偶未知聞誠曰不妨與之往還其人文似

西漢

出撫言

### 秦韜玉

秦韜玉出入田令孜之門車駕幸蜀韜玉已拜丞郎判  
鹺及小歸公主文韜玉准敕放第仍編入其年榜中韜  
玉致書謝新人皆呼同年略曰三條燭下雖阻文闈數  
仞牆邊幸同恩地

出撫言

陸辰

陸辰舉進士屬僖宗幸梁洋隨駕至行在與中書舍人鄭損同止逆旅辰為宰相韋昭度所知欲身事之速了屢告昭度昭度曰奈已深夏復使何人為主司辰以鄭損對昭度從之因令辰致意榜帖皆辰自定其年六月狀頭及第後在翰林署時苦熱同列戲之曰今日好造榜矣然辰名冠一時兄弟三人時謂三陸希聲及威也

出北夢  
瑣言

張曙

張曙崔昭緯中和初西川同舉相與詣日者問命時曙  
自恃才名籍甚人皆目為將來狀元崔亦分居其下無  
何日者殊不顧曙第目崔曰將來萬全高第曙有愠色  
日者曰郎君亦及第然須待崔家郎君拜相當此時過  
堂既而曙果以慘恤不終場昭緯其年首冠曙以篇什  
刺之曰千里江西陪驥尾五更風小失龍鱗昨夜浣花  
溪上雨綠楊芳草為何人崔甚不平會夜飲崔以巨觥

飲張張推辭再三崔曰但吃却待我作宰相與郎君取狀  
頭張拂衣而去因之大不叶後七年崔自內廷大拜張  
後於裴贄下及第果於崔下過堂

出撫  
言

崔昭矩

崔昭矩大順中裴贄下狀元及第翌日兄昭緯登庸王侁丞  
相魯公損之子侁及第翌日損登庸侁過堂別見歸點親迎  
拜席曰狀元及第榜下版巡脫白晷月無疾而卒

出撫  
言

賈泳



賈泳父修有義聲泳落拓不拘細碎嘗佐武臣倅晉州  
時昭宗幸蜀三榜裴相贊時為前主客員外客游至郡  
泳接之傲睨裴嘗簪笏造泳泳戎裝一揖曰主公尚書  
邀放鷁子勿怪如此惚惚而退裴贊頗銜之後裴三主  
文柄泳兩舉為裴所黜既而謂門人曰賈泳潦倒可哀  
吾當報之以德遂放及第

出撫  
言

太平廣記卷一百八十三

欽定四庫全書

太平廣記卷一百八十四

貢舉七

昭宗

韋甄關

劉纂

鍾傳

盧文煥

趙光逢

盧延讓

韋貽範

楊玄同

封舜卿

高輦

氏族

李氏

王氏

七姓

李積

崔湜

類例

李嶠

張說

楊氏

李益

莊恪太子妃

白敏中

汝州衣冠

黃生

昭宗

昭宗皇帝頗為孤進開路崔凝覆試但是子弟無問文  
章高下率多退落其間屈人頗多孤寒中惟程晏黃韜

擅場之外其餘以呈試考之濫得亦不少矣然如王貞白張蠩律詩趙觀文古風之作皆臻前輩之閭闕者也

出撫  
言

### 劉纂

劉纂者商州劉蛻之子也亦善為文乾寧中寒栖京師偶與一醫士為隣纂待之甚至徃徃假貸之其人即樞密使門徒嗣薛王為大京兆醫工因為知柔診脈從容之際盛言纂之窮且屈知柔甚領覽會試官以解送等

第稟於知柔知柔謂纂是開府門前人醫者之言必開  
府之意也非解元不可由是以纂居首送纂亦莫知其  
由自是纂落數舉方悟竟無以自雪

出撫  
言

### 鍾傳

唐朝自廣明庚子之亂甲辰天下大荒車駕再幸岐梁  
饑饉相望郡國率不以貢士為意江西節帥鍾傳起於  
義聚奄有疆土充庭述職為諸侯表式而乃孜孜以薦  
賢為急務雖州里白丁片文隻字求貢於有司者莫不

盡禮接之至於考試之辰設會供帳甲於治平行鄉飲之禮嘗率賓佐臨視拳拳然有喜色後大會以餞之筐篋之外率皆資以桂玉解元三十萬解副二十萬其餘皆不減十萬垂三十載此志未嘗稍息時舉子者以公卿關節不遠千里而求首薦歲常不下數輩

闕

### 盧文煥

盧文煥光化二年狀元及第頗以讌醪為急務常府開讌同年皆患貧無以致之一旦給以遊齊國公亭子既

至皆解帶徒容煥命團司牽驢時柳璟告文渙以驢從  
非已有文煥曰藥不瞑眩厥疾弗瘳璟甚銜之居四年  
璟登庸文渙憂戚日加璟每遇之曰藥不瞑眩厥疾弗

瘳  
出樞  
言

### 趙光逢

光化二年趙光逢放柳璟及第光逢後三年不遷時璟  
自內庭大拜光逢始以左丞徵入未幾璟坐罪誅死光  
逢膺大用居重地十餘歲上表乞骸守司空致仕二年



復徵拜上相

出撫言

盧延讓

盧延讓光化三年登第先是延讓師薛能為詩詞意入癖時人多笑之吳融向為侍御史出官峽中延讓時薄游荆渚貧無卷軸未遑贄謁會融表弟滕籍者偶得延讓百篇融既覽大奇之且曰此無他貴語不尋常耳於是稱之於府主成汭時故相張公職於是邇常以延讓為笑端及融言之咸所改觀由是大獲舉糧延讓深所

感激然猶因循竟未相面值融赴急徵尋入內庭孜孜  
於公卿間稱譽不已光化戊午歲來自襄之南融一見  
如舊相識延讓鳴咽流涕於是攘臂成之矣

出樞  
言

韋貽範

羅隱顧雲俱受知於相國令狐綯顧雖齟齬賈之子而風  
韻詳整羅亦錢塘人鄉音乖刺相國子弟每有宴會顧  
獨預之風韻談諧莫辨其寒素之士也顧文賦為時所  
稱而切於成名嘗有啓事陳於所知只望丙科盡處竟

列於尾株之前也羅既頻不得意頗怨望竟為貴遊子弟所排契濶東歸黃寇事平朝賢議欲召之韋貽範沮之曰某與同舟而載雖未相識舟人告云此有朝官羅曰是何朝官我脚夾筆亦可敵得數輩必若登科通籍吾徒為粃糠也由是不果召

出北夢  
瑣言

### 楊玄同

唐天祐年河中進士楊玄同老於名場是歲頗亦彷徨未涯兆朕宜祈吉夢以卜前途是夕夢龍飛天乃六足

及見榜乃名第六則知固有前定矣

出玉堂閒話

封舜卿

封舜卿梁時知貢舉後門生鄭致雍同受命入翰林為學士致雍有俊才舜卿才思拙澀及試五題不勝困弊因託致雍秉筆當時識者以為座主辱門生同光初致

仕

出北夢瑣言

高輦

禮部貢院凡有榜出書以淡墨或曰名第者陰注陽受

淡墨書者若鬼神之跡耳此名鬼書也范質云未見故  
實塗說之言未敢為是嘗記未應舉日有登第者相告  
舉子將策名必有異夢今聊記憶三數夢載之於此高  
輦應舉夢雷電晦冥有一小龍子在前吐出一石子輦  
得之占者曰雷電晦冥變化之象一石十科也將來科  
第其十數矣及將放榜有一吏持主文帖子至問小吏  
姓名則曰姓龍詢其名第高卑則曰第十人又郭俊應  
舉時夢見一老僧寢於卧榻上蹢躅而行既寤甚惡之

占者曰老僧上座也著屐於卧榻上行履高也君其魏  
我矣及見榜乃狀元也王汀應舉時至滑州旅店夢射  
王慎徵一箭而中及將放榜或告曰君名第甚卑汀答  
曰苟成名當為第六人及見榜果如所言或者問之則  
告以夢王慎徵則前年第六人及第今射而中之故知  
亦此科第也質於癸巳年應舉考試畢場自以孤平初  
舉不敢決望成名然憂悶如醉晝寢於逆旅忽有所夢  
寐未吽間有九經蔣之才相訪即驚起而坐且告以夢

夢被人以朱筆於頭上亂點已牽一胡孫如驢許大將  
即以夢占之曰君將來必捷無是第三人矣因問其說  
即曰亂點頭者再三得也朱者事分明也胡孫大者為  
猿算法圓三徑一故知三數也及放榜即第十三人也

出玉堂  
閒話

### 氏族

#### 李氏

後魏孝文帝定四姓隴西李氏大姓恐不入星夜乘鳴

駝倍程至洛時四姓已定訖故至今謂之駝李焉

出朝野僉

載

王氏

太原王氏四姓得之為美故呼為鈹鏤王家喻銀質而

金飾也

出國史補

七姓

高宗朝以太原王范陽盧榮陽鄭清河博陵二崔趙郡隴西二李等七姓其族望恥與諸姓為婚乃禁其自相



姻娶於是不敢復行婚禮密紫飾其女以送夫家

出國史纂

### 李積

李積酒泉公義琰姪孫門戶第一而有清名常以爵位不如族望官至司封郎中懷州刺史與人書札唯稱隴

西李積

出國史補

### 崔湜

崔仁師之孫崔湜修等昆仲數人文翰列官清要每私

宴之際自比王謝之家謂人曰吾之人門及出身官歷未嘗不為第一丈夫當先據要路以制人豈能默默受制于人故進取不已而不以令終

出撫言

類例

世有山東士大夫類例三卷其有非士族及假冒者多不見錄署云相州僧曇剛撰後柳冲亦明族姓中宗朝為相州刺史詢問舊老云自隋已來不聞有僧曇剛蓋懼嫉於時故隱其名氏

出國史補

李嶠

初李嶠與李迥秀同在廟堂奉詔為兄弟又西祖王璋  
與信安王禕同產故趙郡隴西二族昭穆不定一會之  
中或孫為祖或祖為孫

出國  
史補

張說

張說好求山東婚姻當時皆惡之及後與張氏親者乃  
為申明四姓鄭氏不離滎陽又崗頭盧澤底李士門崔

皆為鼎甲

出國  
史補

楊氏

楊氏自楊震號關西孔子葬於潼關亭至今七百餘年

子孫猶在閩鄉故宅天下一家而已

出國史補

李益

李尚書益有宗人庶子同名俱出於姑臧公時人謂尚書為文章李益庶子為門戶李益而尚書亦兼門第焉嘗姻族間有禮會尚書歸笑謂家人曰大堪笑今日局

席兩箇坐頭總是李益

出因話錄

莊恪太子妃

文宗為莊恪選妃朝臣家子女者悉被進名士庶為之不安帝知之召宰臣曰朕欲為太子婚娶本求汝鄭門衣冠子女為新婦聞在外朝臣皆不願共朕作親情何也朕是數百年衣冠無何神堯打家羅訶去因遂罷其選

出盧氏  
雜說

白敏中

白敏中為相嘗欲以前進士侯溫為子壻且有日矣其

妻盧氏曰身為宰相願為我壻者多矣已既姓白又以侯氏兒為壻必為人呼作白侯爾敏中為之止焉敏中始婚也已朱紫矣嘗戲其妻為接脚夫人又妻出輒導之以馬妻既憾其言每出必命撤其馬曰吾接脚夫人安用馬也

出玉泉子

汝州衣冠

汝州衣冠無非望族多有子女有汝州叅軍亦令族內於一家求親其家不肯曰某家世不共軒冕家作親情

出虛氏  
雜說

黃生

有黃生者擢進士第人問與頗同房否對曰別洞黃本  
溪洞豪姓生故以此對人雖哈之亦賞其直實也

出尚書故

實

太平廣記卷一百八十四



欽定四庫全書

太平廣記卷一百八十五

銓選一

蔡廓

謝莊

劉林甫

張說

溫彥博

戴胄

唐皎

楊師道

高季輔

薛元超

楊思立

張仁禕

裴行儉

三人優劣

劉奇

狄仁傑

鄭杲

薛季昶

鄧渇

李至遠

張文成

鄭愔崔湜

糊名

蔡廓

宋廢帝時以蔡廓為吏部尚書錄尚書徐羨之謂中書令傅亮曰黃門已下悉委蔡吾徒不復歷懷自此已上故宜共參同異廓聞之曰我不能為徐羨之署紙尾也

遂辭不拜

出建康寶錄

謝莊

宋謝莊字希逸侍中微之子黃門恩之孫美儀容善談  
論工書屬文好言玄理少為文帝所賞帝一見之輒嘆  
曰藍田生美玉豈虛也哉莊代顏竣為吏部尚書竣容  
貌嚴毅常有不可犯之色莊風姿溫美人有喧訴嘗歡  
笑答之故時人語曰顏吏部瞋而與人官謝吏部笑不  
與人官莊遷中書令侍中謚曰憲莊家世無年五十者  
莊年四十二祖四十七曾祖四十三高祖三十子朏淪

並知名

出談  
數

劉林甫

唐武德初因隋舊制以十一月起選至春即停至貞觀二年劉林甫為吏部侍郎以選限促多不究悉遂奏四時聽選隨到注擬當時以為便

出唐  
會要

張說

武德七年高祖謂吏部侍郎張說曰今年選人之內豈無才用者卿可簡試將來欲縻之好爵於是說以張行

成張知運等數人應命時以為知人

出唐會要

### 溫彥博

貞觀元年溫彥博為吏部郎中知選意在沙汰多所擯抑而退者不伏囂訟盈庭彥博惟騁辯與之相詰終日

喧擾頗為識者所嗤

出唐會要

### 戴胄

貞觀四年杜如晦臨終請委選舉於民部尚書戴胄遂以兼檢校吏部尚書及在銓衡頗抑文雅而獎法吏不

適輪轅之用物以是刺之

出唐會要

唐皎

唐貞觀八年十一月唐皎除吏部侍郎常引人入銓問何方穩便或云其家在蜀乃注與吳復有云親老先住江南即唱之隴右論者莫測其意有一信都人希河朔因給云願得江淮即注與河北一尉由是大被選人給

言欺之

出唐會要

楊師道

貞觀十七年楊師道為吏部尚書貴公子四海人物未能委練所署多非其才深抑勢貴及親黨將以避嫌時

論譏之

出唐  
會要

### 高季輔

貞觀十七年吏部侍郎高季輔知選凡所銓綜時稱允  
愜至十八年於東都獨知選事上賜金鏡一面以表清

鑒

出唐  
會要

### 薛元超

永徽元年中書舍人薛元超好汲引寒俊嘗表薦任希古高智周郭正一王義方孟利真等十餘人時論稱美

出唐

會要

楊思玄

龍朔二年司列少常伯楊思玄恃外戚貴待選流多不以禮而排斥之為選者夏侯彪所訟御史中丞郎餘慶彈奏免官時中書令許敬宗曰必知楊吏部之敗或問之對曰一彪一狼共著一羊不敗何待

出唐  
會要



張仁禕

唐總章二年十一月吏部侍郎李敬玄委事於員外張仁禕有識畧幹能始造姓厯改修狀抹銓替等程式敬玄用仁禕之法銓總式序仁禕感國士見委竟以心勞

嘔血而死

出唐會要

裴行儉

咸亨二年有楊炯王勃盧照鄰駱賓王並以文章見稱吏部侍郎李敬玄咸為延譽引以示裴行儉行儉曰才

名有之爵祿蓋寡楊應至令長餘並鮮能令終是時蘇味道王勣未知名因調選遂為行儉深禮異仍謂曰有晚生子息恨不見其成長二公十數年當居衡石願識此輩其後果如其言行儉嘗所引偏裨將有程務挺張虔勗崔智訥王方翼党金毘劉敬同郭待封李多祚黑齒常之盡為名將

出唐會要

三人優劣

長壽二年裴子餘為鄆縣尉同列李隱朝程行誥皆以

文法著稱子餘獨以詞學知名或問雍州長史陳崇業  
三人優劣孰先崇業曰譬之春蘭秋菊俱不可廢

闕

### 劉奇

證聖元年劉奇為吏部侍郎注張文長司馬鏗為監察  
御史二人因申屠場以謝之奇正色曰舉賢本自無私

二君何為見謝

出唐  
會要

### 狄仁傑

聖歷初狄仁傑為納言頗以藻鑒自任因舉桓彥範敬

暉崔玄暉張柬之袁恕已等五人後皆有大勲復舉姚  
元崇等數十人悉為公相聖歷中則天令宰相各舉尚  
書郎一人仁傑獨薦其子光嗣由是拜地官員外蒞事  
有聲則天謂之曰祁奚內舉果得人也

出唐  
會要

### 鄭杲

聖歷二年吏部侍郎鄭杲注韓思復為太常博士元希  
聲京兆士曹嘗謂人曰今年掌選得韓元二子則吏部  
不負朝廷矣

出唐  
會要

薛季昶

長安三年則天令雍州長史薛季昶擇僚吏堪為御史者季昶以問錄事參軍盧齊卿齊卿舉長安縣尉盧懷慎李體光萬年縣尉李義崔湜咸陽縣丞倪若水鰲屋縣尉田崇壁新豐縣尉崔日用後皆至大官

出唐  
舊要

鄧渴

弘道元年十二月吏部侍郎魏克己銓綜人畢放長榜遂出得留人名於是衢路喧嘩大為冬集人援引指擿

貶為太子中允遂以中書舍人鄧玄挺替焉又無藻鑒之目及患消渴選人因號鄧渴

出唐會要

李至遠

如意元年九月天官郎中李至遠權知侍郎事時有選人姓刁又有王元忠並被放乃密與令史相知減其點畫刁改為丁王改為士擬授官後即添成文字至遠一覽便覺曰今年銓覆萬人總識姓名安有丁士者哉此刁某王某也省内以為神明

出唐會要

張文成

唐張文成曰乾封以前選人每年不越數千垂拱以後  
每歲常至五萬人不加衆選人益繁者蓋有由矣嘗試  
論之祇如明經進士十周三衛勲散雜色國官直司妙  
簡實材堪入流者十分不過一二選司考練總是假手  
冒名勢家囑請手不把筆即送東司眼不識文被舉南  
館正員不足權補試攝檢校之官賄貨縱橫贓污狼籍  
流外行署錢多即畱或帖司助曹或員外行案更有挽

郎輦脚營田當屯無尺寸功夫並優與處分皆不事學  
問唯求財賄是以選人冗冗甚於羊羣吏部喧喧多於  
蟻聚若銓實用百無一人積新化新所從來遠矣

出朝野僉

鄭愔崔湜

唐鄭愔為吏部侍郎掌選職污狼籍引銓有選人繫百  
錢於靴帶上愔問其故答曰當今之選非錢不行愔默  
而不言時崔湜亦為吏部侍郎掌銓有選人引過分疏



云某能翹關負米滉曰若壯何不兵部選答曰外邊人皆云崔侍郎下有氣力者即得

出朝野僉載

### 糊名

武后以吏部選人多不實乃令試日自糊其名暗考以定等第判之糊名自此始也武后時投匭者或不陳事而有嘲謔之言於是乃置使先閱其書奏然後投之匭院有司自此始也

出國史  
異纂

太平廣記卷一百八十五

欽定四庫全書

太平廣記卷一百八十六

銓選二

斜封官

盧從愿

韋抗

張仁愿

杜暹

魏知古

盧齊卿

王丘

崔琳

裴光庭

薛據

李林甫

張說

張奭

楊國忠

陸贄

鄭餘慶

裴遵慶

李絳

李建

崔安潛

斜封官

唐景龍年中斜封得官者二百人從屠販而踐高位景雲踐祚尚書宋璟御史大夫畢構奏停斜封人官璟構出後見鬼人彭卿受斜封人賄賂奏云見孝和怒曰我與人官何因奪却於是斜封皆復舊職偽周革命之際十道使人天下選殘明經進士及下村教童蒙博士皆

被搜揚不曾試練並與美職塵黷士人之品誘悅愚夫  
之心庸才者得官以為榮有才得官以為辱昔趙王倫  
之篡也天下孝廉秀才茂異並不簡試雷同與官市道  
屠沽亡命不軌皆封侯略盡太府之銅不供鑄印至有  
白版侯者朝會之服貂者大半故謠云貂不足狗尾續  
小人多幸君子恥之無道之朝一何連類也惜哉

載

出朝  
野僉

### 盧徙愿

景雲元年盧從愿為侍郎精心條理大稱平允其有冒名為選虛增功狀之類皆能摘發其事典選六年頗有聲稱時人曰前有裴馬後有盧李裴即行儉馬謂戴李

謂朝隱

出唐會要

### 韋抗

景雲二年御史中丞韋抗加京畿按察使舉奉天縣尉梁昇卿新豐尉王倕金城縣尉王水華原縣尉王燾為判官其後皆著名位

出唐會要

張仁愿

景雲二年朔方總管張仁愿奏用監察御史張敬忠何  
奕長安縣尉寇泚鄜縣尉王易徙始平縣主簿劉體微  
分判軍事義烏縣尉晁良貞為隨軍後皆至大官

出唐  
會要

杜暹

景雲二年盧從愿為吏部侍郎杜暹自婺州叅軍調集  
補鄭縣尉後暹為戶部尚書從愿自益州長史入朝暹  
立在盧上謂之曰選人定何如盧曰亦由僕之藻鑑遂

使明公展千里足也

出唐  
會要

魏知古

先天元年侍中魏知古嘗表薦洹水縣令呂太一蒲州  
司功叅軍齊澣右內率府騎曹柳澤及為吏部尚書又  
擢密縣尉宋遙左補闕袁暉封希顏伊闕縣尉陳希烈  
其後咸居清要

出唐  
會要

盧齊卿

開元元年盧齊卿為幽州刺史時張守珪為果毅特禮



接之謂曰十年內當節度果如其言也

出唐  
會要

### 王丘

開元八年七月王丘為吏部侍郎擢山陰尉孫逖桃林尉張鏡微湖城丞張晉明進士王泠然李昂等不數年

登禮闈掌綸誥焉

出唐  
會要

### 崔琳

十一年十二月吏部侍郎崔琳銓日收選殘人盧怡裴

敦復于號卿等十數人無何皆入臺省眾以為知人

出唐  
會要

裴光庭

開元十八年蘇晉為侍郎而侍中裴光庭每過官應批退者但對衆披簿以朱筆點頭而已晉遂榜選院門下點頭者更引注擬光庭以為侮已不悅時有門下主事閻鱗之為光庭腹心專主吏部過官每鱗之裁定光庭隨口下筆時人語曰鱗之口光庭手

出唐會要

薛據

開元中薛據自恃才名於吏部參選請授萬年錄事諸

流外官共見宰執訴云錄事是某等清要官今被進士  
欲奪則某等色人無措手足矣遂罷

出撫  
言

### 李林甫

自開元二十年吏部置南院始懸長名以定畱放時李  
林甫知選寧王私謁林甫曰就中乞一人林甫責之於  
是榜云據其書判自合得畱緣屬寧王且放冬集

出國  
史補

### 張說

中書舍人張均知考父左相張說知京官考特注曰父

教子忠古之善訓祁奚舉子義不務私至如潤色王言  
章施帝載道參墳典例絕常功恭聞前烈尤難其任豈  
以嫌疑敢撓綱紀考上下

出玄宗  
實錄

張奭

苗晉卿典選御史中丞張倚男奭參選晉卿以倚子思  
悅附之考等第凡六十四人奭在其首蘇考蘊者為薊  
令乃以選事告祿山祿山奏之玄宗乃集登科人於花  
萼樓前重試升第者十無一二奭手持試紙竟日不下

一字時人謂之拽白上大怒貶倚敕曰庭闈之間不能訓子選調之際乃以托人天下為戲談晉卿貶安康

出盧

氏雜說

### 楊國忠

天寶十載十一月楊國忠為右相兼吏部尚書奏請兩京選人銓日便定畱放無少長各於宅中引注號國姊妹垂簾觀之或有老病醜陋者皆指名以笑雖士大夫亦遭斥恥故事兵吏部注官訖於門下過侍中給事中

省不過者謂退量國忠注官呼左相陳希烈於坐隅給事中行列於前曰既對注擬即是過門下了希烈等腹誹而已侍郎韋見素張倚皆衣紫與本曹郎官藩屏外排比案牘趨走語事乃謂簾中楊氏曰兩箇紫袍主事何如楊乃大噓選人鄭某附會其旨與二十餘人率錢於勤政樓設齋簾為國忠立碑於尚書省南所注吏部三銓選人專務鞅掌不能躬親皆委典及令史孔目官為之國忠但押一字猶不可遍

出唐續會要

陸贄

貞元八年春中書侍郎平章事陸贄始復令吏部每年  
集選人舊事吏部每年集人其後遂三數年一置選選  
人併至文書多不可尋勘真偽紛雜吏因得大為奸巧  
選人一蹉跌或十年不得官而官之闕者或累歲無人  
贄命吏部分內外官員為三分計闕集人歲以為常其  
弊十去七八天下稱之

出唐  
會要

鄭餘慶

宣平鄭相之銓衡也選人相賀得入其銓劉禹錫  
曰予從弟某在鄭銓注湖州一尉唱唯而出鄭呼  
之却迴曰如公所試場中無五六人一唱便受之此而  
不獎何以銓衡公要何官去家穩便曰家住常州乃注  
武進縣尉選人翕然畏而愛之及後作相過官又稱第  
一其有後於魯也又云陳諷張復元各注畿縣請換縣  
允之既而張却請不換鄭牒子引張纔入門已定不可  
改時人服之

出嘉  
話錄



裴遵慶

裴遵慶罷相知選朝廷優其年德令就第注官自宣平

坊榜引士子以及東市兩街時人以為盛事

出國史補

李絳

長慶初吏部尚書李絳議置郎官十人分判南曹吏人

不便旬日出為東都畱守自是選曹成狀常速畢

出國史補

李建

李建為吏部郎中常曰方今秀茂皆在進士使僕得志

當令登第之歲集于吏部使尉緊縣既罷復集稍尉望  
縣既罷乃尉畿縣而升於朝大凡中人三十成名四十  
乃至清列遲速為宜既登第遂食祿既食祿必登朝誰  
不欲也無淹翔以守常限無紛競以來奔捷下曹得其  
循舉上位得其更歷就而言之其利甚博議者多之

出  
國

史  
補

崔安潛

崔安潛東洛掌選時選人中不能顯其名姓竊顧雲啓

事投獻者崔公不之知大賞嘆名之與語便注一起資  
縣令後有人白崔公方悔

出盧氏  
雜說

太平廣記卷一百八十六

欽定四庫全書

太平廣記卷一百八十七

職官

宰相

上事

蘇瓌

兩省

獨孤及

參酌院

陽城

呂溫

韋絢

李程

雜說

御史

同州御史

崔遠

嚴武

押班

臺門

歷五院

韓臯

雜說

使職

尚書省

崔日知

度支

柳闢

省橋

秘書省

魚袋

莎廳

宰相

凡拜相禮絕班行府縣載沙填路自私第至於子城東街名曰沙堤有服假或問疾百僚就第有司設幕次排

班元日冬至立仗大官皆備珂傘列燭有五六百炬謂之火城宰相將至則皆撲滅以避之宰相判四方之事有都堂處分有司有堂帖下次押名曰花押黃敕既下小異同曰黃帖宰相呼為堂老初百官早朝必立馬建福望僊門外宰相則於光宅車坊以避風雨元和初

始置待漏院

出國史補

### 上事

凡中書門下並於西省上以便禮儀五品以上宰相送

上乃並卿參

出國史補

蘓瓌

景龍三年蘓瓌除尚書右僕射時公卿大臣初拜官者例計獻食名曰燒尾瓌因侍內宴將作大匠宗晉卿謂曰拜僕射竟不燒尾豈不善邪帝默然瓌奏曰臣聞宰相者主陰陽助天理物今粒食踊貴百姓不足臣見宿衛兵至有三日不得食者臣愚不稱職所以不敢燒尾

出談  
賓錄



兩省

諫議無事不入每遇入省有厨食四孔炙中書舍人時  
謂宰相判官等相親嫌不拜知制誥為躡脚又云不由  
三字直拜中書舍人者謂之撻額裏頭其制誥之本出  
自王言皆人主所為故漢光武時第五倫為督鑄錢掾  
見詔書而嘆曰此聖明主也一見決矣近者凡有詔敕  
皆責成羣下褒貶之言哲王所慎凡百具僚王公卿士始  
褒則謂其珪璋特達善無可加旋有貶黜則比以斗筭

下才罪不容責同為一字之行固出君上之言愚智生於倏忽是非變於俄頃蓋天子無戲言言之苟失則取

尤天下

出盧氏雜說

獨孤及

獨孤及求知制誥試見元載元知其所歡迎謂曰制誥阿誰堪及心知不我與而與他也乃薦李紆時楊炎在閣下忌及之來故元阻之乃二人力也

出嘉話錄

參酌院

長慶初穆宗以刑法為重每大獄有司斷罪又令給事

中中書舍人參酌出入之百司呼為參酌院

出國史補

### 陽城

陽城居夏縣拜諫議大夫鄭錡居閩鄉拜拾遺李周南

居曲江拜校書郎時人以轉遠轉高轉卑

出國史補

### 呂溫

通事舍人宣詔舊命拾遺團句把麻者蓋謂者不知書多失句讀故用拾遺低摘聲句以助之及呂溫為拾遺

被喚把麻不肯去遂成故事拾遺不把麻者自呂始也  
時柳宗元戲呂云幸識一文半字何不與他把也

出嘉話錄

韋絢

開成末韋絢自左補闕為起居舍人時文宗稽古尚文  
多行貞觀開元之事妙選左右史以魏謩為右史俄兼  
大諫入閣秉筆直聲遠聞帝倚以為相者期在旦暮對  
駁進諫細大必行公望美事朝廷拭目以觀文貞公之  
風彩會文宗宴駕時事變移遂中輟焉時絢已除起居

舍人楊嗣復於殿下先奏曰左補闕韋絢新除起居舍人未中謝奏取進止帝頷之李珪招而引之絢即置筆札於玉堦欄檻之石遽然趨而致詞拜舞焉左史得中謝自開成中至武宗即位隨仗而退無復簪筆之任矣遇簪筆之際因得密邇天顏故時人謂兩省為侍從之班則登選者不為不達矣

出嘉話錄

### 李程

李程為翰林學士以堦前墀日影為入候程性懶每入

必踰八塼故號為八塼學士

出傳載

雜說

兩省相呼為閣老尚書丞郎相呼為曹長員外郎御史拾遺相呼為院長上可兼下下不可兼上侍御史相呼

為端公

出國史補

御史

御史故事大朝會則監察押班常參則殿中分班入閣則侍御史監奏蓋含元殿最遠用八品宣政其次用七

品紫宸最近用六品殿中得立花塼綠衣用紫案褥之類號為七貴監察院長與同院禮隔語曰事長如事端凡上堂絕言笑有不可忍雜端大笑則合座皆笑謂之哄堂哄堂不罰大夫中丞入三院罰直盡放其輕重尺寸由於吏人而大者存之黃卷三院上堂有除改者不得終食唯刑部郎中得終之

出國史補

### 同州御史

王某云往歲任官同州見御史出案廻止州驛經宿不

發忽索雜案又取印歷鎖驛門甚急一州大擾有老吏竊哂乃因庖人以通憲胥許以百緡為贈明日未明御史已啓驛門盡還案牘乘馬而去

出國史補

崔遠

崔遠為監察巡囚至神策軍為吏所陷張蓋而入又諷軍中索酒食意欲結歡實文場怒奏立敕就臺鞭於直廳而流之自是巡囚不至禁軍

出國史補

嚴武



寶應二年大夫嚴武奏在外新除御史食宿私舍非宜自此乃給公乘元和中元稹為監察與中使爭驛廳為其所辱始有敕節度觀察使臺官與中使先到驛者得

處上廳為定制

出國  
史補

押班

凡大朝會監察押班不足則使下侍御史因朝奏者攝

之出國  
史補

臺門

御史臺門北開蓋取肅殺就陰之義故京臺門北開矣  
按鄴郡故事云御史臺在宮城西南其門北開故城  
御史臺亦北開龍朔中置桂坊為東朝憲府門亦北開  
然都御史臺門南開當時創造者不經反於故事同諸  
司蓋以權宜邪御史臺記

又北開者或云是隋初移都之時兵部尚書李圓通兼  
御史大夫欲向省便近故開北門出談賓錄

歷五院

臺儀自大夫已下至監察通謂之五院御史國朝歷跋  
五院者共三人焉李尚隱張延賞溫造也

出尚書  
故實

### 韓臯

韓臯為御史中丞常有所陳必於紫宸殿對百寮而請  
未嘗詣便殿上謂之曰我與卿言於此不盡可來延英  
當與卿從容或無遺事親友或謂臯曰自乾元已來羣  
臣啟事皆詣延英方得詳盡公何獨於外庭對衆官以  
陳之無失於慎密乎韓曰御史天下之持平也權剛直

枉唯在公共所言之事貴人知之奈何求請便殿避人  
竊語以私國家之法且延英之置也肅宗皇帝以苗晉  
卿年老艱步故設之後來臣寮得詣便殿多以私自售  
希求恩寵欲徇其身奈何以此為望哉

出傳載

雜說

諫院以章疏之故憂患略同臺中則務糾舉省中多事  
旨趨不一故言遺補相惜御史相憎郎官相輕

出國史補

使職

開元已前於外則命使臣否則止自置八節度十採訪  
始有坐而為使其後名號益廣於是有為使則重為官  
則輕故天寶末有佩印至三十者大厯中請俸有至千  
貫者今在朝太清宮太微宮度支鹽鐵轉運知苑閑廐  
左右巡分察監察館驛監倉監庫左右街外任則節度  
觀察諸軍押蕃防禦團練經略鎮遏招討擁鹽水陸運  
營田給納監牧長春宮有時而置者則大禮禮儀會盟  
刑定三司黜陟巡撫宣慰推覆選補禮會冊立弔祭供

軍糧料和糴此其大略經置而廢者不錄官官內外悉  
謂之使舊為權臣所綰州縣所理今屬中人者有之出  
補史

尚書省

郎官故事吏部郎中二廳先小銓次格式員外郎二廳  
先南曹次廢置刑部分四覆戶部分兩賦其制尚矣舊  
說吏部為省眼禮部為南省舍人考功度支為振行比  
部得廊下食以飯從者號比盤二十四曹呼左右司為

都公省中語曰後行祠屯不博中行都門中行禮部不

博前行駕庫

出國史補

崔日知

崔日知歷職中外恨不居八座及為太常卿於都寺廳事後起一樓正與尚書省相望時人謂之崔公望省樓

出國史

異纂

度支

故事度支案郎中判入員外判出侍郎總疏押案而已

貞元己後始為使額郎官當直發敕為重水部員外郎  
劉約直宿會河北繫囚配流嶺南夜發敕直宿令史不  
更事唯嶺南不下河北旬月後本州聞奏約遂出官出  
補史

柳闢

吏部甲庫有朱泚偽黃案數百道省中常取戲翫已而  
藏之柳闢知甲庫始白執政於都堂集八座丞郎焚之

出國  
史補



省橋

尚書省東南隅通衢有小橋相目為扃項橋言侍御史及殿中久次者至此必扃項南望南宮也都堂南門道東有古槐垂陰至廣相傳夜深聞絲竹之音省即有入相者俗呼為音聲樹祠部呼為冰聲廳言其清且冷也因出

話錄

秘書省

唐初秘書省唯主寫書貯掌勘校而已自是門可張羅

迥無統攝官屬望雖清雅而實非要劇權貴子弟及好利誇侈者率不好此職流俗以監為宰相病坊少監為給事中中書舍人病坊丞及著作即為尚書即病坊秘書即及著作左郎為監察御史病坊言從職不任繁劇者當改入此省然其職在圖史非復喧卑故好學君子厭於趨競者亦求為此職焉

出兩京記

### 魚袋

朝儀魚袋之飾唯金銀二等至武后乃改五品以銅中

宗反正從舊


出國史  
異纂

莎廳

京兆府判司時云兩法士此兩廳事多東士曹廳時號  
為念珠廳蓋判案一百八道西士曹廳為莎廳廳前有  
莎週迴可十五步京兆府時云不立兩縣令不坐兩少  
尹兩縣引馬到府門傳門而報兩尹入廳大尹亦到廳  
不得候兩尹坐後出不得候兩尹立後出其京兆府縣  
之重亦表大尹之尊京兆府掾曹時人云倚國省郎河

中府司錄廳亦有綠莎昔好事者相承常溉灌天祐已  
後為不好事者除之

出聞  
奇錄



太平廣記卷一百八十七